

## PRIPREME ZA KURBAN-BAJRAM

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji u ime Uzvišenog Allaha prinose žrtve.

Braćo moja u Dini Islamu! Mi se, evo, nalazimo u danima u kojima ovogodišnje hadžije polahko počinju sa obredima hadža i kada se cijeli islamski svijet priprema za doček najvećeg islamskog praznika – Kurban-bajrama.

Kao čovjek, koji je obavio hadž i koji dobro zna kakav je osjećaj biti Allahov gost i posjetiti Njegova časna mjesta, mogu samo reći: Blago se hadžijama! Pogotovo onima koji prvi put idu na hadž, iako je svaka posjeta Ka'bi jedna posebna, lijepa priča za sebe. Ali prva posjeta Ka'bi i prvi pogled na nju izaziva osjećaj koji, jednostavno, nije sa ovoga svijeta. Iako je u tom trenutku u Haremu Ka'be prisutno na stotine hiljada hadžija, Allahov gost stiče dojam da tu nema nikoga. Između njega i Ka'be je prazan prostor i on apsolutno ne čuje nikakav žamor. Kao da je vrijeme stalo.

Blago se hadžijama koje za sebe obavljaju hadž, iako je i hadž za drugoga (bedeluk) vrijedan spomena i nosi svoju nagradu. Ali hadž za sebe znači da je hadžija lično Allahov gost, koji je došao lično za sebe da traži Allahovu milost, oprost grijeha i ulaznicu za Džennet. Koji je došao da svojim nogama prohodi stazama kojima su hodili Adem, a.s., Ibrahim, a.s., Ismail, a.s., Muhammed, s.a.v.s., kao i brojni drugi Allahovi poslanici. Da prohodi Arefatom, Muzdelifom i Minnom, Saffom i Mervom, Ka'binim Haremom.

Umra je umra. Lijepa i vrijedna. Manje je i gužve nego na hadžu. I jeftinija je nego hadž. I češće se može obaviti nego hadž. Ali, hadž je hadž. Peta islamska dužnost, peti stub Islama i kruna ibadeta. Istina, hadž traži puno novca, priprema, truda, vremena, sabura. Ali se isplati. I to je samo jednom u životu. Na ovaj ili onaj način, svako može uštedjeti. Samo mora željeti, nijet donijeti i onda se polahko pripremati. Ništa se samo od sebe ne može uraditi niti pokrenuti. A Gospodar nas je pozvao. Na najveće i najljepše putovanje. Za kojim čezne onaj koji čezne za svojim Gospodarom.

Braćo moja! Kao što hadž datira od Ibrahima, a.s., tako isto datira i kurban. Iskušenjem kojim je Uzvišeni Allah tražio od Ibrahima, a.s., da žrtvuje svoga sina Ismaila, a.s., Uzvišeni Allah je htio da pokaže da se tradicija žrtvovanja ljudi lažnim i nepostojećim božanstvima mora prekinuti, da se kurban samo Uzvišenim Allahu mora prinostiti, da se kurbanskim mesom gladni trebaju nahraniti i činom darovanja kurbanskog mesa ljudi jedni drugima približiti. Zato pripremimo svoje kurbane! Nebitno da li ih mi lično prinostili ili nekoga ovlastili da za nas to učini. Nebitno u kojoj državi ga prinostili i poklonili. Nebitno koju cijenu platili. Cijena kurbana varira od zemlje do zemlje, ali je njegova nagrada svugdje ista.

Kako kaže Gospodar svjetova: "**Do Allaha neće doći ni meso ni krv kurbana, ali će Mu doći vaša bogobojaznost. Tako vam je Allah potčinio kurbane da biste Ga tekbirima veličali zato što vas je na Pravi put uputio. A ti obraduj dobročinitelje.**" (El-Hadždž, 37.) Iako do Allaha neće doći ni meso ni krv kurbana, kurban ipak treba da bude što ljepši i bez vidljivih mahana. Mora se prinijeti iza Bajram-namaza a najkasnije do ikindije trećeg dana Kurban-bajrama. Dvije trećine mesa se moraju podijeliti, a ko želi može i cijeli kurban pokloniti.

Tekbiri tešrik, tj. tekbir kojeg su izgovorili Džibril, Ibrahim i Ismail, a.s., nakon što je Džibril došao sa kurbanom, izgovarat ćemo pet dana. Počinjemo sa sabahom na Dan Arefata i završavamo sa ikindijom četvrtog dana Kurban-Bajrama, učeći ga nakon svakog farza. **Allahu ekberu-llahu ekber. La ilahe illallahu vallahu ekber. Allahu ekber ve lillahil-hamd.** Ako zaboravimo iza farza, proučit ćemo kad se sjetimo. A Dan Arefata, koji je u utorak, ćemo i postiti. Muhammed, s.a.v.s., je rekao da post Dana Arefata briše grijeha koji su počinjeni u prošloj i narednoj godinu, što je šansa koju, jednostavno, ne smijemo propustiti.

U srijedu, akobogda, nastupa Kurban-bajram. Sabah-namaz u našoj džamiji ćemo klanjati u 4.50 h a Bajram-namaz u 6.10 h. U slučaju potrebe Bajram-namaz ćemo klanjati na dva puta. Apelujem da dođemo navrijeme i da povedemo računa o parkiranju te da ne zatvaramo cestu. Preporučujem parking kod ALBI-ja, koji u to vrijeme neće biti otvoren, a vlasnik nam je dao dozvolu.

A uporedo sa pripremama za Bajram traju i naše pripreme za ovogodišnji proljetni teferič (Kermes). U tom smislu nas pozivam da danas nakon džuma-namaza uzmemo učešće u akciji čišćenja i pripremanja džematskog dvorišta, te da se upišemo na listu donatora i radnika na teferiču. Naravno, uvijek će biti onih koji više učestvuju od drugih, ali je bitno da nas što više učestvuje. Nagrada je uvijek prema zaslugi. A na kraju krajeva, i to je jedna vrsta kurbana.

Molim Dragog Allaha da nama i našim porodicama ukabuli kurbane i da nas zaštiti njihovim hurmetom; da nam podari zdravlje i ozdravljenje i počasti posjetom Njegovim časnim mjestima; da nam primi post Dana Arefata i očisti nas od grijeha; da se smiluje našoj braći i sestrama koji su u iskušenjima i problemima, nebitno gdje živjeli; i da nas nagradi za naš trud i našu brigu oko našeg Džemata i naše džamije. Amin.